

DOMENIE IX «VIE PAL AN»

Antifone di jentrade cf. Sal 24,16.18

Voltiti de mê bande, Signôr, e ve misericordie,
parcè che o soi bandonât e puar.
Cjale il gno aviliment e la mê pene,
bute lontan di te ducj i miei pecjâts.

Colete

Diu, che la tô providence no fale in ce che e à destinât,
ti preìn a schene plete
che tu slontanis di nô dut ce che al pues fânus mâl
e tu nus dedis dut ce che nus confâs.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Re 8,41-43

Se al ven il forest, tu, Signôr, scoltilu.

Dal prin libri dai Rês

In chei dîs, Salomon al preà tal templi disint: «Ancje il forest che nol è dal to popul Israel, se al ven di un puest lontan par vie dal to non – parcè che si sintarà a fevelâ dal to non grant, de tô man fuarte e dal to braç slungjât –, se al ven e al pree in chest templi, tu scoltilu dal cîl là che tu sês a stâ, dai dut ce che il forest ti domande, di mût che ducj i popui dal mont a ricognossin il to non e a vedin teme di te come che al fâs il to popul Israel, e a sepin che chest templi che jo o ài fat sù al è pal to non».

Peraule di Diu.

SALM RESPONSORIÂL dal Salm 116

R. Ti adoraran, Signôr, ducj i popui de tiere.

O ben:

R. Aleluia, aleluia, aleluia.

Laudait il Signôr, ducj vualtris popui,
ducj vualtris, foescj, cjantait la sô glorie. **R.**

Al è stât grant par nô il so boncûr
e la fedeltât dal Signôr e dure par simpri. **R.**

SECONDE LETURE Ga 1,1-2.6-10

Se o cirîs ancjemò di plasêur ai oms, no sarès servidôr di Crist.

De letare di san Pauli apuestul ai Galazians

Pauli, apuestul no de bande dai oms o in virtût di un om, ma in virtût di Jesù Crist e di Diu Pari che lu à risussitât dai muarts, e ducj i fradis che a son cun me, a lis Glesiis de Galazie.

O resti che si sedis distacâts cussì a la svelte di chel che us veve clamâts cu la gracie di Crist, par passâ a un altri vanzeli. No 'nd è un altri! Ma ind è di chei che a semenin la zizanie fra di vualtris e a vuelin savoltâ di fonde fûr il vanzeli di Crist. Però se nô o un agnul vignût jù dal cîl us predicjàs un vanzeli diferent di chel che us vin predicjât, che al sedi bandonât a la maludizion di Diu! Come che us ài dit prime, o torni a dî ancje in chest moment: se cualchidun us predicje un vanzeli diferent di chel che o vês cjapât sù, che al sedi bandonât a la maledizion di Diu! Di fat cumò cirio di imbroiâ i oms o Diu? O cirio di plasêur ai oms? Se o cirîs ancjemò di plasêur ai oms, no sarès servidôr di Crist.

Peraule di Diu.

CJANT AL VANZELI Zn 3,16

R. Aleluia, aleluia.

Diu i à volût tant di chel ben al mont,
che al à dât so Fi, l'unigjenit;
chei che a crodin in lui a àn la vite eterne.

R. Aleluia.

VANZELI Lc 7,1-10

Nancje in Israel no ài cjatade une fede cussì grande.

Dal vanzeli seont Luche

In chê volte, Jesù, finît di fevelâi al popul che al stave in scolte, al jentrà in Cafarnao. Un servidôr di un centurion al jere malât e al riscjave di murî. Il centurion i voleve une vore ben. E cussì, a pene che al sintì a fevelâ di Jesù, i mandà un pôcs di anzians dai Judeus a preâlu di vignâ a salvâi il so servidôr. Rivâts di Jesù, lôr lu preavin cun insistence: «Chel che nus mande al merte judât. I ten al nestri popul e al è stât lui a fânus sù la sinagoghe». Alore Jesù si invià cun lôr. Nol jere tant lontan de cjase cuant che il centurion i mandà incuintri un pôcs di amîs a dîi: «Signôr, no sta disturbâti. Jo no mertì che tu jentris cjase mê, par chel nancje jo no mi soi ritignût degn di vignâ di te; ma dîs dome une peraule e il gno servidôr al vuarissarà. Ancje jo o soi sot comant e o ài sot di me un pôcs di soldâts. E i dîs a di un: Va, e lui al va; e a un altri: Ven, e lui al ven; e i dîs al gno servidôr: Fâs chest, e lui lu fâs». Cuant che Jesù al sintì chestis peraulis, al restà maraveât. Alore si voltà viers la fole che i leve daûr e ur disè: «Us garantìs che nancje in Israel no ài cjatade une fede cussì grande». E chei che a jerin stâts inviâts, tornâts cjase, a cjatarin il servidôr vuarît. Peraule dal Signôr.

Su lis ufiertis

Confidant tal to boncûr, Signôr,
o vignìn al to altâr sant cui nestris regâi
par che, purificâts de tô gracie,
o podìn jessi smondeâts cui misteris che o celebrìn come tiei servidôrs.
Par Crist nestri Signôr.

Antifone a la comunion Sal 16,6

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs oreli:
scolte ce che ti dîs.

Daspò de comunion

Daspò di vênus nudrîts cul Cuarp e cul Sanc di to Fi,
tegninus sù cul to Spirt, Signôr,
par che ti testimonein no dome cu la peraule e la lenghe,
ma ancje cu lis oparis e la veretât
e cussì o podìn jentrâ intal ream dai cîi.
Par Crist nestri Signôr.